

DITLHALOSO

¶ Ga mmogo le bopaki jona le ditemogo tsa kgaitsadia rona yo o tlhokafetseng, ke tlaa rata go tlogela mafoko ana, le nna. Go tlwaelana ga me ga ntsha le lelwapa la boora Bell e ne e le monna wa gagwe, Jimmy, yo neng e le tsala e kalo ya khupamarama ko go rrê yo o fetetseng pele. Mme fong go tleng ga dingwaga, ke ne ka nna modiredi mme ke ne ka tlwaelana le Kgaitsadi Bell, mme ka mo itse e le Mokeresete wa mmannete wa morapedi. Rotlhe re tlaa mo tlhogelwelwa, gongwe le gongwe. Go motlhoho thata go bua mafoko ka ga mongwe yo o jaana, ka gore ga o a tshwanela gore o gogege sepe morago. O ne a le se se neng se batliwa go nna Mokeresete.

² Erile ke utlwa kgaitsadi a opela, metsotso e le mmalwa e e fetileng, go nkogopotsa fela mo gontsi ka ga moopelo wa gagwe, jaaka re mo itse tikologong fano. O ne a rata go opela. Ke itumetse thata gore sena se dirilwe, gonngone ka mnnete go dirile ka fa Kgaitsadi Bell a neng a ka bo a ikutlwile ka teng. O ne a tlaa bo a ratile go itlhalosa ka tsela eo ka mafoko. Thapelo ya me, mme thapelo e e tlhoafetseng ke gore, rotlhe re tlaa tla kwa bokhutlong jwa tsela ka bopaki jo bo jaaka jo a neng a na najo.

³ Ke eletsa go bala dingwe go tswa mo Lekwalong fano, seripa fela. Ke ikutlwile gore o ne a le morati yo mogolo ga kalo wa Lefoko la Modimo, mme Lefoko la Gagwe ke le le Senang bokhutlo thata. Mme ke ne ka akanya gore ke tlaa bala bontlhabongwe jwa kgaolo ya bo 14 ya ga—ya ga Jobe.

Motho yo o tsetsweng ke mosadi ke wa malatsi a le mmalwa, mme a tletse bothata.

O tswa jaaka sethunya, mme a kgaolwe: o tshaba gape jaaka moriti, mme ga a tswelele gope.

...a o budulogela yo o ntseng jalo matlho, o ba o nkisa katholong nao?

Ke mang yo o ka tlisang selo se se phepa mo go se se itshekologileng? ga go na ope.

Ka e le gore malatsi a gagwe a laotswe, palo ya dikgwedi tsa gagwe di na le wena, wena o mo tlhomelsetse melewane e a sa kakeng a e tlola;

Mo hulare, gore a tle a ikhutse, go fitlhela a diragaditse, jaaka mothapiwa ka tuleo, motlha wa gagwe.

Gonne go na le tsholofelo ya setlhare, fa se remilwe, gore se tlaa tlhoga gape, le gore dikala tse di nana tsa sone ga di na go khutla.

Le fa modi wa sone o onalela mo lefatsheng, le thito ya sone e swela mo mmung;

Le fa go ntse jalo ka monkgo wa metsi se tlaa tlhoga, mme se ungwe . . . jaaka semela.

Fela motho o a swa, a bo a nyelele: eya, . . . a neele mowa, mme ena o kae?

Jaaka metsi a palelwe mo lewatleng, le merwalela e fela e bo e omelela:

Motho o robala jalo, mme ga a tlhatloge: go fitlhela magodimo a sa tlhole a le teng, ga ba tle go tsoga, kgotsa ba thanye mo borokong jwa bone.

Ao tlhe gore wena o tle o mphitlhе mo lebitleng, gore wena o tle o mpeelee sephiri, go fitlhela malatsi a tshakgalo ya gago a fetile, . . .

Fa motho a swa, a o tlaa tshela gape? malatsi otlhe a nako ya me e e tlhomilweng ke tlaa leta, go fitlhela phetogo ya me e tla. Nna . . .

Wena o tlaa bitsa, . . . Ke tlaa go araba: o tlaa nna le keletso go dira tiro ya seatla sa gago.

Gonne jaanong wena o bala dikgato tsa me: . . . wena tota o tlhokometse boleo jwa me?

⁴ Ke bala go tswa mo Lefokong la Bosakhutleng, ke tlaa rata gore rona re akanye ka ga fela lefoko le le lengwe metsotso e le mmalwa, mme lefoko leo ke: *Ditlhaloso*.

⁵ Go na le botshelo jo bontsi thata jo bo leng ditlhaloso. Mme ga go ope yo o tshelang mo lefatsheng fa e se yo nako nngwe mo botshelong jwa gagwe a tshwanetseng go ema mme akanye ka ga kwa a tswang gone, se boikaelelo jwa gagwe bo leng sone fano, le kwa a yang gone morago ga fano. Mongwe le mongwe o a rata, o tlaa rata go leba ka kwa ga sesiro.

⁶ Ke neng ke bala fano go tswa mo Bukeng e kgologolo go feta thata mo Baebeleng, Jobe, mogolwane yona, o ne a leka go bona sone selo sena. Mme o ne a ikgolola mo tlhotlhеletsegong ya gagwe ko Modimong, a supa gore Ena o ne a le bo—botshelo morago ga loso.

⁷ Rona nako tse dingwe re ikutlwа jalo, fa re lebagantshwa le sengwe se se jaana, gore mona ke gotlhe. Fela ga se gone. Ke go fetoga. Ke kga . . . kgato e e kwa godimonyana go feta. Ke go feta go tswa botshelong bo le bongwe go ya ka ko go jo bongwe.

⁸ Mme Jobe, moporofeta, jaaka a ne a akanya ka dilo tsena, o ne a go lemoga mo dithutong tsa dimela, botshelong jwa dimela, botshelong jwa ditlhare. Jalo he o ne a lemoga seo, ka fa e leng gore Modimo o tshwanetse a bo a le mo lobopong lwa Gagwe; gore fa A dirile lobopo, go raya gore O tshwanetse a tshele mo lebopong, ka gore O le diretse boikaelelo, gore Ene

a tshele mo teng, jaaka ntlo e motho a tlaa e agang. Matshelo a mannyennyane ana a a leng mo lobopong lotlhe la Modimo a fa tlase ga taolo ya Mmopi wa one. Mme o ne a akanya, gore, fa letsbutsubu le ne le tlaa mme le ne le tle le digelete faatshe setlhare se se maatla, le fa go ntse jalo, moo e ne e se bokhutlo jwa setlhare seo. Se tlaa tshela gape. Fa setlhare se sule, se tlaa tshela.

⁹ Mme makgetlo a le mantsi, nako e re kgobegileng maikutlo, fa fela re tlaa leba mo tikologong ya rona, o ka bona Modimo gongwe le gongwe. Jaanong re tlaa Mo tsaya, jaaka mo setlhareng, fa setlhare se jwetswe fano.

¹⁰ Mme sengwe le sengwe se fano go direla boikaelelo, fela jaaka re le fano go direla boikaelelo, fela jaaka kgaitssadia rona a ne a le fano go direla boikaelelo. Rona rotlhe re fano ka maikaelelo a Modimo, fa re ka kgona go bona se boikaelelo joo bo leng sone mme re tloge re bo direle sentle. Foo, ka nnene, fa Modimo a kgathala mo go lekaneng ka ga tsogo ya botshelo jwa dimela, Ena o kgathala mo go lekaneng ka tsogo ya botshelo jwa motho.

¹¹ Jalo he Jobe ne a lemoga, mogolwane, gore—gore setlhare, fa se sule, se ne se tshela gape. Le ka fa e leng gore selemo le mariga di ne di fetola botho jwa sone, mme letsatsi lengwe le lengwe foo le ne le tlogela bopaki. O ne a lemoga fa se—setlhare se ne se tshela mo nakong ya selemo, mme jaaka go lebega mo nakong ya mariga se ne se swa, matlhare a a neng a lepelela mo setlhareng.

¹² Jaanong, re rutilwe mo Lekwalong, gore, go na le Setlhare sa Botshelo. Se ne se le ko tshimong ya Etene. Mme Setlhare sena sa Botshelo ke kwa Bakeresete ba kaletseng gone, jaaka letlhare mo Setlhareng sena.

¹³ Mme jaanong mo nakong ya mariga, fa matlhare a le mantle, goreng, one... Kgotsa, ka nako ya selemo, ke raya moo, fa matlhare a le mantle ebile a le matala, morago ga lobaka serame se a tla mme se a take mebala e e farologaneng, mme one a wa mo setlhareng. Mme botshelo bo boela ka mo moding wa setlhare. Fa fela re lemoga, ke selo sa masaitseweng.

¹⁴ Fano nako nngwe e e fetileng, ke ne ka lebagantshwa, go bua le monna yo neng a ipolela gore ke yo o sa senang tumelo, modumologi. Mme re ne re eme fa setlhareng sa apole se e neng e le sa gagwe. Mme ke ne ka mmotsa gore setlhare se ne se le dingwaga di le kae, mme o ne a mpolelela gore ke dingwaga di le bontsi jo kana, le gore ke di dielo di le kae tsa diapole tse se di ntshitseng ngwaga mongwe le mongwe ka nosi. Mme mona e ne e le mo karolong ya pele ya Phatwe, mme ke ne ka itse, ka lemoga gore diapole di ne di setse di wa, mme matlhare a ne a fetoga a nna borokwa. Mme ke ne ka mo raya ka re, “Ke tlaa rata go go botsa potso.” Ke ne ka re, “Gobaneng matlhare ao a fetoga a nna borokwa ebile a wa mo setlhareng pele ga serame sepe se a ama?”

¹⁵ “Sentle,” o ne a re, “gone ke mariga a a tlang. Mme lebaka le a fetogang go nna borokwa ke ka gore botshelo bo tlogetse letlhare.”

Ke ne ka re, “Botshelo bo ile ko kae?”

¹⁶ Mme o ne a nthaya a re, “Morago kwa moding wa setlhare, kwa bo tswang gone.”

Mme ke ne ka re, “A moo ke ga bofelo ga letlhare?”

¹⁷ O ne a re, “Nnyaya. Botshelo joo bo tlaa boa gape dikgakologo tse di latelang gape, ka letlhare le leša.” O ne a ise a go lemoge pele.

¹⁸ Ke ne ka re, “Fong, ke a rapela o mpolelele, rra, ke Botlhale bofeng jo bo tlosang letlhare lele mo setlhareng le e leng pele ga seemo se se tsididi sa bosa, ebile bo romela botshelo jwa lone morago tlase ka ko mmung, go direla pabalesego, go tsamaya go tleng ga paka e nngwe. O ka tsenya metsi mo emereng wa bo o a bayo mo paleng, ga a kitla a fetoga go ya ka paka. Jalo he go supegetsa gore go na le Modimo Yo o leng mankge wa botshelo.”

¹⁹ Mme rona ba re ithayang gore re Bakeresete, ba ba tsetsweng ke Mowa wa Modimo, re ne, ka letlhogonolo la Modimo, ra huduswa go tloga setlhareng sa loso go ya setlhareng sa Botshelo. Mme fa lengwe la matlhare le wela faatshe, jaaka ke utlwile bopaki joo go tswa ko ke...kerekeng ena e e gakgamatsang, ko kerekeng ya Gilt Edge Baptist, kwa ba le bantsi ba ditsala tsa me tse di rategang thata ba leng maloko gone, kwa lengwe la matlhare a yone a weleng gone. Re a itse gore botshelo joo bo boetse ko go Modimo Yo o bo neileng boikaelelo bongwe, fela gore bo tle gape mo tsogong ya kakaretso; le ka motlha ope gore bo sekä jwa wela faatshe gape, ko Mileniamong. Nako e kgolo e etla.

²⁰ Jobe o ne a lemogile dilo tsena. Ka nako eo o ne a lemoga mo botshelong jwa letsatsi.

²¹ Fa lo tlaa lemoga, mo mosong, letsatsi le a tlhatloga, ke lesea. Marang a lone a bokoa. Fong le tla mo dingwageng tsa lone tsa bonana, e ka nna nako ya ferabongwe kgotsa lesome. Fong ka nako ya sethoboloko, bogareng jwa letsatsi, le mo nonofong ya lone. Le tloge le simolole go kotlomela, mme kwa bofelong le phirime gape ka kwa ko Bophirimata-tsatsi, jaaka le swela kong mo letsatsing le. A re ka bitsa moo bokhutlo jwa letsatsi? Nnyaya. Moso o o latelang, le boa gape, go tlisa motlha o moša mo go rona.

²² Jaanong, sena ke eng? Ke tlhaloso ya Modimo. Mme lefoko tlhaloso le raya “go itsise maikutlo.” Ke Modimo a dira go tlhalosa...tlhaloso ya gagwe mo go rona, go re itsese maikutlo a Gagwe ka rona, gore loso ga le re aroganye ka Bosakhutleng. Re tlaa tsoga gape, re boe gape.

²³ Nako nngwe le nngwe e peo e swang mo lefatsheng, mo legwetleng la ngwaga, fela jaaka dithunya tsena, tsone, dipeo

tse dinnye di wela ko ntle ga tsone fa serame se di ama, mme peo e fologela mo mmung. Mme go le seeng jaaka go ka nna ga lebega, ntswa go ntse jalo ke boammaaruri, Modimo ke yo o senang selekanyo thata gore ga A tlodise sepe matlho. O na le popelelo ya phitlho ya sethunya sa Gagwe. Morago ga serame se sena go di ama, go tloge go tle dipula, le dikeledi tse ditona ton, tsa marothodi a pula, di wa go tswa legodimong, mme di fitlhe peo eo ya sethunya, e phophothe mo go yone, mme gongwe yne e tsena intšhi kgotsa di le pedi kwa tlase ga lefatshe. Go tloge diphefo tse di tsididi tsa mariga di simolole go foka gotlhe, mme—mme makakaba a mannye a ile, le thito e ile, mme fong digwere di a gatsela di bo di omelele. Mme fong peo e nnnye e gatsele, le matute a elele a tswe mo go sone. Mme, goreng, ka nako ya dikgakologo, o ka se kgone go fitlhela sepe se se setseng sa sone.

²⁴ Fela a moo ke bokhutlo jwa sethunya? Le goka. Se ne sa bewa fano ka ntlha ya boikaelelo. Mme fa se diretse boikaelelo jwa sone sentle, ka nako eo Modimo a re itsise, ka ga sethunya, tlhaloso ya Gagwe ko rona.

²⁵ Go tlhomame fela jaaka letsatsi le atamela gaufinyana le lefatshe, go tlisa marang a a bothito go feta, wena o ka se kgone go fitlha botshelo joo gope. O ka nna wa bo khurumetsa ka lefika. A lo kile lwa lemoga fa o bay a konkereite ya gago mo nakong ya mariga, bojang bo bo kima go feta thata kae mo dikgakologong? Gone go dikologa losi la konkereite. Goreng go le jalo? Ke botshelo joo jo bo leng fa tlase ga lefika. Motlhlang letsatsi le simolola go šapisa lefatshe, o ka se kgone go tshwara botshelo. Se tlaa batla tsela ya sone go tswa fa tlase ga konkereite mme se tlhagise tlhogonyana ya sone, gore se rorise Modimo, ka gore letsatsi ke tsogo. L-e-t-s-a-t-s-i ke tsogo ya botshelo jotlhe jwa dimela. O ka se kgone go bo fitlha fa fela letsatsi le phatsima.

²⁶ M-o-r-w-a o bonala, makgetlo a le mantsi, okare o kgakala thata. Fela fa A simolola go phatsima, “Letsatsi la tshiamo le tlaa tlthatloga ka phodiso mo diphukeng tsa Gagwe.” Mme botshelo bongwe le bongwe, go sa kgathalesege kwa bo fitlhilweng gone, ka foo bo tseneletseng, bokgakala jo bo kae mo metsing, kgotsa mo metlhabeng, mo mafikeng, bo tlaa tlthatlogela ko kgalalelong ya Modimo.

²⁷ Ka gore, Modimo o a re supegetsa, a re supegetsa fela se A se dirang. Boikaelelo jwa gagwe ke go re supegetsa, ka dithunya, ka letsatsi, ka ditlhare, ka botshelo jotlhe, gore Ena ke tsogo le Botshelo. Modimo o tsosa Botshelo jwa Gagwe fa bo direla boikaelelo a Gagwe.

²⁸ Mme fa sethunya se direla maikaelelo a sone, mme Modimo a na le tsogo ya sethunya, ke ga kae go leng ga kgaitsadia rona yo o direlang boikaelelo jwa gagwe mo botshelong. Modimo o na le

tsogo ya bao ba ba direlang boikaelelo jwa bona. Re ka fitlhela boikaelelo jwa rona mme ra tloga ra bo direla.

²⁹ Dithunya tse dinnye tsena, o ka nna wa botsa ka ga tsone. Tsone di fano, tshokologong eno, go direla maikaelelo. Seo ke se dithunya tsena, Modimo a nang natso ka ntlha ya gone, go direla maikaelelo. Go tswelela pele le pele go ka tswelela.

³⁰ Fa lo lemoga, dithunya tsena ga se dithunya tsotlhe tse di nang le mmala o o tshwanang. Di farologana ka mmala, go supegetsa gore Modimo ke Modimo wa mefutafuta. O rata mebala e e farologaneng. Go di tswakanya ga mmogo go dira lesitla le A le ratang. Modimo, Modimo wa mefutafuta. O na le dithunya tsa Gagwe tse di tshweu. O na le dithunya tsa Gagwe tse di khubidu. Mme tsa Gagwe, mebala yotlhe ya dithunya, mme go di baya ga mmogo go direla boikaelelo jwa Gagwe.

³¹ O na le dithaba tse ditona, le dithabana tse di nnye, le dipoa. O na le dikaka. O na le lewatle. O na le setlhare sa moeike, setlhare sa mokolane. Sengwe le sengwe se nyalana ga mmogo mo lefelong la sone, kwa e leng gore, Modimo, Modimo wa tlholego yotlhe o kgona go tshela a bo a akola boleng jwa Gagwe, jaaka a tshela mo dibopiweng tsa Gagwe mo nakong, tse di direlang maikaelelo a Gagwe.

³² Fa A akanya mo go lekaneng go tsosa seo, mme a direla moo tsela ya phalolo, ka ntlha ya tirelo ko bokamosong gape, ke ga kae go feta ka foo Ena nang le gone ka batho, go sa kgathalesege ba rona re leng bone, lotso lefe, mmala, tumelo ya kereke, kgotsa le fa e ka nna eng mo gongwe, ba ba ka kgonang go dula ga mmogo mo bongwefeleng jwa Bolengteng jwa Modimo le tshegofatso ya Gagwe. Go tlaa nna le tsogo, letsatsi lengwe, go tlhomame fela jaaka go na le tsogo ya sethunya. Rotlhe re bona seo. Rotlhe re dumela seo. Rotlhe re a itse gore dilo tsena tsotlhe ke tlhaloso. Di a paka, di re bolelela, di dira, di itse maikutlo a Modimo a batlang gore re a itse.

³³ Batho ba ba rometseng dithunya tsena, ditsala tsa kgaitsadi rona ba ba romtseng dithunya tsena, le bone ba itsese lelwapa, ba ba tlhalosetsa gore maikutlo a bona a matshediso ka tsala, ka kgaitsadi, kgotsa—kgotsa yo o ratiwang. Ba leka go tlhalosa. Tsone ke ditlhaloso, di itsise, di itsise sengwe phatlalatsa.

³⁴ Dilo tsotlhe tsena tse re ka buang ka tsone, dioura, ditlhaloso tsa Modimo mo losikeng loo motho, tsotlhe tsena di na le karolo ya tsone, mme di e tshameka sentle. Sethunya sengwe le sengwe, setlhare sengwe le sengwe, tlhabo nngwe le nngwe ya letsatsi, kotlomelo le lengwe ya letsatsi, sengwe le sengwe se tshameka karolo ya sone sentle. Fela ditlhaloso tsotlhe tseo tsa Modimo, di re itsise, mme di re naya sekai, gore O ne a ile go dira tlhaloso e kgolo letsatsi lengwe, tlhaloso ya Bosakhutleng.

³⁵ Fong O ne a re romelela setshwantsho sa Gagwe se se bonaditsweng, mo popegong ya ga Morwae. Modimo o rometse

Morwae, mo setshwantshong se se bonaditsweng sa Gagwe, go itsise losika loo motho se A neng a se akanya ka ga rona. O ne a fetola popego ya Gagwe. O ne a fetoga go nna motho. O ne a fetoga go nna mongwe wa rona.

³⁶ Go tswa ko go Modimo, Rara wa Bosakhutleng, go tswa mo Mmoping yo mogolo Yo, pele ga go ne go ka nna le lefatshe, a neng a tladiitse lefaufau lotlhe, nako. Go ne go sena eibile le met—metara kgotsa metara wa lesedi, le e leng athomo kgotsa molekhule e ne e seyo, O ne a le Modimo. Mme O tlaa tlhola a le Modimo. Fela Ena yo mogolo Yo... Fa o ka leba godimo bosigo mme wa bona dinaledi mo thulaganyong ya letsatsi le dipolanete. Dinyaga dingwe tse di fetileng, ke ne ka nna le tshiamelo ya go leba ka diferekeke tse dikgolo tsena, mme kwa ba bolelang gore lo kgona go bona dingwaga di le didikadike di le lekgolo le masome a mabedi tsa lefaufau la lesedi, dimetara tsa lesedi. Mme ka kwa ga seo go santse go na le dingwedi le dinaledi le mafatshe, tse A di laolang.

³⁷ Mme foo O ne a kgathala thata mo go lekaneng gore a re direle tlhaloso, a neng a itse gore Ena o mogolo thata. Le fa go ntse jalo, O ne a fologa mo popegong ya motho wa nama, go tlhalosa se A neng a le sone. O ne a fetoga go nna Monna wa bohutsana, a tlwaelanye le peloebotlhoko. O ne a tshela botshelo jwa motho wa nama. O ne a sena lefelo la go robatsa tlhogo ya Gagwe. O ne a supa se Gone, se Modimo a neng a le sone. O ne a fodisa balwetsi ba rona fa re ne re lwala. O ne a tsosa baswi, go supegetsa gore O ne a le setshwantsho se se bonaditsweng sa Modimo. O ne a re tlhomela leano rotlhe, ko e leng gore rona le rona re ka kgona go leba ko ditlhalosong tse di nnye tsena mme ra bona Modimo. Fong re ka leba ko godimo mme ra bona tlhaloso e kgolo ya Modimo, mme re nne le tlhomamiso, ka nako eo, gore fa dioura tsena di tla, mona ga se bokhutlo jwa gone.

³⁸ Ke rata polelo e kgaitadia rona, mo go opele, a neng a e bua metsotso e le mmalwa e e fetileng, “Yona ke kgaitadiak. Nka se kgone go e opela ka tsela ena” fa e se a ne a itse kwa a neng a le teng. Lo a bona?

³⁹ Go na le tsela e re itseng kwa re yang gone, ka gore setshwantsho se se bonaditsweng sa Modimo se ne sa tlhomala leano lena. Mme, O ne a re, le fa e le mang yo o tlaa amogelang leano lena o tlaa nna le Botshelo jo Bosakhutleng. Johane 5:24 ne ya re, “Ena yo o utlwang Mafoko a Me, mme a dumela mo go Ena yo o Nthometseng, o na le Botshelo jo bosafeleng, mme ga a ketla a tla ka mo Katholong; fela o fetile losong go ya Botshelong.”

⁴⁰ Tlhaloso e kgolo go gaisa ya tsotlhe e ne e le Jesu Keresete, Yo neng a re direla tsela. O ne a diragatsa eibile a rurifatsa ditlhaloso tsotlhe tse dithunya tsena, le botshelo jwa dimela, le jalo jalo, le letsatsi, le thulaganyo la letsatsi le dipolanete, di supileng pele ga go Tla ga Gagwe, gore go ne go tla Mongwe yo e leng Mosiame

yo o tlaa re dirang gore re E dumele ka nitamo, ka gore O tlaa nna setshwantsho se se bonaditsweng sa Modimo. Mme erile A ne a tla, mme a dira se A se dirileng, O ne a tlhomamisa gore ditlhaloso tsena di ne di nepagetse. O ne a di naya thurifatso. Ka gore, jaaka sethunya se tsoga gape, setlhare se tsoga gape, letsatsi le tsoga gape, le Mokeresete o tlaa tsoga gape. Go tshwanetse go dira. Ka gore, Modimo, mo setshwantshong se se bonaditsweng sa motho wa nama, kgotsa motho wa nama mo setshwantshong se se bonaditsweng sa Modimo, o go netefaditse ka tsogo ya Gagwe.

⁴¹ Fong, teng foo, nako e moporofeti a neng a bona dilo tsena di diragala; Jobe, fa a ne a bona botshelo jotlhе jwa dimela, le jalo jalo. Ka nako eo, rona ba re tlwaelanyeng le Baebele re a go itse. A neng a dutse mo totomeng ena ya molora, mo tlalelong, bothata bo ne bo mo iteile. Maloko a kereke ya gagwe a ne a mmoleletse gore o ne a . . . ne a leofetse mo sephiring.

⁴² Nako tse dintsi go nnile ga buiwa, gore, “Motho yo o swang pele ga nako, kgotsa sengwe, moo e ka nnang ya bo e le boleo bongwe jo ba bo dirileng. Ba dirile sengwe se se phoso.” Eseng . . . Moo ga se kgetse mo Mokereseteng.

⁴³ Erile a ne a bona tlhaloso ena e kgolo, ya bofelo, Modimo a itsise leano la Gagwe ka Jesu Keresete, o ne a goa ka lentswe. Fa dikgadima di ne di pekenya le ditumo tsa maru di ne di rora, o ne a re, “Ke a itse Morekolodi wa me o a tshela, mme kwa metlheng ya bofelo O tlaa ema mo lefatsheng. Mme le fa morago ga diboko tsa letlalo di sena go senya mmele wa me, ntswa go le jalo mo nameng ya me ke tlaa bona Modimo, Yo ke tla mmonang ka sebele.” O ne a bona tlhaloso eo ya bofelo, makgolo a dinyaga di le ditnsi kwa pele. Fela, a leng moporofeti, mo ponatshegelong o ne a bona go tla ga tlhaloso ya Modimo e kgolo.

⁴⁴ O ne a kgona go leba fa tlase mme a bone tsogo ya dipeo. O ne a kgona go bona tsogo ya ditlhare. Le tsogo ya letsatsi, morago ga le sena go direla nako ya lone, ebole le tsogile gape; ne le diretse letsatsi, le tsogela letsatsi le lengwe. Dithunya tsa tirelo e le nngwe ya phitlho, di swe, mme di tsogele tirelo ya yo mongwe ya phitlho. Sengwe le sengwe se direla maikaelelo a sone. Fong o ne a bona, mo bokgakaleng, go Tla ga Yo o Siameng yoo, mme a goeletsa, “Ke a itse Morekolodi wa me o a tshela.”

⁴⁵ “Nama ya me e tlaa ikhutsa mo tsholofelong,” ne ga bua Dafita, “ka gore ga A tle go lettlelala Moitshepi wa Gagwe go bona go bola; ebole ga A tle go tlogela mowa wa Gagwe wa botho ko diheleng.” O ne a bona letsatsi leo, ponagatso eo e e itekanetseng ya Modimo, se A neng a ile go se dira; go itsise, ko mothong, gore loso ga se bokhutlo jwa tsela.

⁴⁶ Mona ga se bokhutlo. Mona ke tshimologo. Ke bokhutlo jwa bohutsana. Ke bokhutlo jwa nako ya tshwetso. Fela ke tshimologo ya nako ya boipelo le tuelo. Ga se bokhutlo jwa

sengwe le sengwe. Ke fela bokhutlo jwa di—jwa dilo tse di swang, go simolola selo se se sa sweng. O ile ko boikhutsong jwa gagwe. Modimo a lapolose mowa wa gagwe wa botho.

⁴⁷ Jaanong, o ne a goa tlhaloso e kgolo ena, ka gore o ne a bone se se neng se ile go diragala.

⁴⁸ Jaanong a re tleng ko phetsong ena. Re phuthegetse fano gompieno, go—go tlhalosa, kgotsa go itsise maikutlo a rona ka ga moagisanyi, ka ga kgaitsadi, ka ga mosadi, ka ga mma. Ke sone se re phuthegileng tshokologong eno; go itsise, go supa maikutlo a rona, tatlhegelo ya rona. Ke sone se re leng fano, go dira sena. Rrê o tshwanetse a tlhalose tatlhegelo ya mosadi; bana, mma; moagisanyi, kgotsa kgaitsadi.

⁴⁹ Rona badiredi. Jaaka ke ba utlwile, go fologa fa gare ga kago, ba ntsha ditshwaelo tseo tse di ntentle, tse di galalelang, tse di gomotsang, di itshekile tota, gore se kgaitsadi a neng a se kaya ko go bona, le ko phuthegong ya bona. Rona badiredi re tlide, tshokologong eno. Jaaka go sololetswe, mo dipelong tsa rona, re ikutlwae re hutsafetse, le rona. Fela re tlide go itsise tlhaloso ya Modimo, le rona, Boammaaruri jwa Gagwe ka ga kgang ena yotlhe. Re tlide go tlhalosa se Modimo a se buang ka ga gone, go gomotsa dipelo tsa batho; go ba itsise, go le bokete jaaka tshoganetso e ka bong e le ka gone, le fa go ntse jalo ke mo tlhokomeleng ya Modimo Mothatiotlhe go go dira ka tsela ena, mme ke leano la Gagwe. Mme mona ga se bokhutlo. Mona ke tshimologo ya botshelo jo boša.

⁵⁰ Fong rona ba Modimo a ba rutang mo Lefokong la Gagwe, ka ga dilo tsena, re tlide go neela tlhaloso ya rona. Mme ka foo ke itumetseng ka teng ka ga yona tshokologong eno, gore rotlhe re ka kgona go supa selo se se tshwanang ko Lefokong la Modimo, ka gore mosadi yo o ne a Le diragatsa.

⁵¹ Kgaitsadi Bell, jaaka re ne re mo itse fano fa motlaaganeng, mosadi yo o rategang, yo o itshepisitsweng, wa Mokeresete, o ne a dira ditlhaloso tsa gagwe, le ene. O ne a itsise maikutlo a gagwe ka ga Modimo. Jaaka ke utlwile ditatolo di ne di balwa, lobakanyana le le fetileng, le e leng pele ga Mokaulengwe Jim a mo nyala, ke a gopola, golo ko Tennessee, o ne a tsaya tshwetso ya gagwe. O ne a dira tlhaloso ya gagwe. Jalo he, ke bopaki. Mme go ya ka fa ke itseng, go tloga letsatsing leo esale, ga a ise a khutle go dira tlhaloso eo. Gongwe, gompieno, jaaka ko diferwaneng tsa Legodimo, golo gongwe ka kwa ko magatong a Bosakhutleng a Kgalalelong, a tsamaya mo mebileng ya Modimo, a santsane a go tlhalosa. Ka kwa ga meriti ena ya magato a ba ba swang, o santsane a go tlhalosa.

⁵² Kgaitsadi Bell, jaaka re mo itse, o ne a sa tlhabiswe ditlhong ke bopaki jwa gagwe. Ga go nako e le nngwe mo go neng ga nna le go tlhonya ga bopaki jwa gagwe. Ga go nako e le nngwe mo a neng a itsemeletsa go bua sengwe. O ne a go supa, mme o ne a sa

tlhajwe ke ditlhong. Ka fa ke mmoneng a eme ko morago koo ka diatla tsa gagwe mo phefong, le dikeledi di elela mo marameng a gagwe. Ke mmona a eme fano mo felong mona ga therelo, mme a opele dipina tse di tlaa dirang kereke yotlhe e tsene ka mo go bokoleleng, ka ga Lefatshe, le le kgakala ka kwa moseja ga fano. O ne a sa tlhajwe ke ditlhong. O ne a neela tlhaloso ya gagwe gongwe le gongwe. Moagelani mongwe le mongwe, kereke nngwe le nngwe, gongwe le gongwe kwa a neng a bopagane gone, o ne a ikitsise, a itsise se a neng a se akanya ka ga Modimo. E ne e le botshelo jwa gagwe, tsotlhе tse a neng a ka kgona go nna tsone, o ne a bonagatsa se a neng a le sone mo go Keresete Jesu, sebopiwa se se tsetsweng seša.

⁵³ O ne a le tsala e e rategang ko go mmē wa me yo o godileng yo o rategang yo—yo neng a pagama direpodi tse di tshwanang, dibeke di le mmalwa tse di fetileng. Gompieno, ba mmogo.

⁵⁴ A selo se se gakgamatsang se e leng sone, go bona ditlhaloso, ka fa Modimo a dirang ka gone. Makwalo a gagwe; Kgaitadi Bell. Nako nngwe le nngwe fa ke ne ke tle ke tle gae, Billy, morwaake, o ne a tle a ntlisetse setlhophsa makwalo, megala ya difounu, kgapetsakgapetsa, go tswa go Kgaitadi Bell. “Rapelela *yona*. Rapelela *yole*.” Seo, se ne se dira eng? Mo go nna, moo ke tlhaloso ya gagwe, ena a itsise se se neng se le ka fa teng ga gagwe; mokgweleo ka ga mo gagabo, mokgweleo ka ga bana ba gagwe, mokgweleo ka ga mongwe le mongwe yo o neng a le tikologong, le motho mongwe le mongwe yo o lwalang.

⁵⁵ Kgaitadi Bell o ne a batlide a tshela ka letlhogonolo la Modimo, dingwaga tsa bofelo di le mmalwa. E ne e le modumedi yo o ikanyegang mo thateng ya Modimo ya phodiso. Mme go ne ga diragala jalo maloba bosigo . . . Ga ke ise ke ko ke mo tshwarele thapelo mo botshelong ya me, mme ka rapela le moitshepi yo o rategang yoo wa kgale, go fitlhela, fa e se fa Modimo a mo fodisa.

⁵⁶ Mme maloba bosigo, fa ke ne ke bidiwa, ke ne fela ka tsena go tswa ko Arizona, e ka nna nako ya bosigogare. Ba ne ba leletsa morwaake mme ba re, “Kgaitadi Shepherd, tsala ya ga Kgaitadi Bell, o batla gore o mo rapele. O ko kokelong.” Ke ne ka go tlhaloganya gore e ne e le Kgaitadi Shepherd; mohumagadi mongwe, kooteng mo kagong jaanong, ka leina la Shepherd, yo a neng a mo itse. Ke ne ka akanya gore o ne a le ko kokelong.

⁵⁷ Moso o o latelang ba ne ba lets a gape, go ka nna lesome le motso le sengwe, mme ba re, “Ga se Kgaitadi Shepherd. Ke Kgaitadi Bell, ka boene, a leng ko sepetlele.” Mme go bona moo, tlhokomelo e e botlhale le leano la Modimo. Pele ga a ka ba a fitlha koo, Kgaitadi Bell o ne a setse a pagame Direpodi tsa gouta. Pele ga nka fitlha koo, Modimo o ne a kgettile rosa ya Gagwe ya mmala, go direla Mileniamo segopa sa Gagwe sa

dithunya. Pele ga nka ba ka fitlha koo, o ne a ile go kgatlhana le Modimo. Tlhaloso ya Modimo ya lorato lwa Gagwe!

⁵⁸ Dingwaga tsotlhe tsena tsa nyalo e e itumetseng e ne e le tlhaloso ya boineelo jwa gagwe jaaka mosadi, go direla monna wa gagwe le bana ba gagwe legae. Moo go ne ga itsupa ka dinako tse di bokete, fa bagoma ba bannye go dikologa tafole, mme go le bokete. Mme, mma, go tsaya mma go itsé ka fa a ka kopanyang dilo ga mmogo ka gone, go go dira gore go nne gone lobaka—nne gone lobaka, nako e melomo e mennye e e tshwerweng ke tlala e dikologileng tafole. Fela, go ema monna wa gagwe nokeng, a ikanyega, go ema bana ba gagwe nokeng, e ne e le tlhaloso ya boineelo jwa popota. Moo ke fa pele ga mongwe le mongwe wa lona. Ga ke na go tshwanela go bua seo. Lo itsé seo go nna boammaaruri. Lo a bona? Ee, rra.

⁵⁹ Mme kuelo e le ka motlha ope e sa palelweng ka ntsha ya bana ba gagwe! Ga ke dumele gore nkile ka kopana nae, kgotsa ka mo tlögela, ntengleng le fa a kopela bana bao topo. Moo go ne ga sugegetsa bomma jwa mmannete, a neng a itsé gore botshelo ke fela toro kgotsa lefelo la paakanyo. Ka ga bana ba gagwe, o ne a batla go ba kgatlhantsha ko Lefatsheng moseja ga fano, kwa go neng go tlaa se tlhole go nna le dinako tse di bokete. Ena ka metlha o ne a tle a nttheye a re... O ne a mpitsa Mokaulengwe Billy. O ne a tlaa re, “Mokaulengwe Billy, rapelela bana ba me, ga go ope wa bone yo o tlaa timelang.” Fa moo go sa bonagatse bommé jwa mmatota; mma yo o nang le kgatlhego mo baneng ba gagwe, a na le kgatlhego mo baagisanying ba gagwe, monna wa gagwe, wa gagwe yo o ratiwang! Ke Modimo mo mosading, a supa dilo tsa Bosakhutleng.

⁶⁰ Ka foo ke tshedisang monna wa gagwe, tsala ya me e e molemo. Ka foo ke tshedisang basimane bao, go utlwa molaetsa wa bangwe ba bone ko Jeremane le mafelo a a farologaneng, mma o ile. Fela a ka tswa a dule mo pele ga lona fano, basimane, fela ga a—ga a swa. Ena o tshela ka bosafeleng. O tshela mo Lefatsheng kwa a neng a go rapelela gore mongwe le mongwe wa lona a tle a kopane nae. Lo se mo swabiseng. Ke tlhomamisitse gore ena ga a tle go dira.

⁶¹ Ke bona mongwe sepeke se le sengwe se tswile mo lekotwaneng lele, tshokologong eno. Ke gakologelwa fa sepeke sa ntsha se ne se ntshiwa mo lelwapeng lwa me. Ka monokela, ba tlaa wa. Ga go tle go nna mo go leelee thata. Reetsang. Lekotwana leo le ka kopanngwa ga mmogo gape, ko Lefatsheng le lengwe kwa go senang makoto a a robegileng, kwa itsholelo e kgolo ya Modimo e kgonang go fitlhelelwa mme e ka kgonang go tswelela pele go ralala dipaka. Mma go nne ka tsela eo, lelwapa. Le tlhotse le na le mma; jaanong nnang nae ka bosafeleng. Go ntse jalo.

⁶² Selo se sengwe se se neng sa bonagatsa lorato lwa Modimo. Jaaka ke tlhaloganya, gore, topo ya gagwe e ne e le gore ga a

kitla a tsofala ebole a diega mo tseleng, a tshwanele go diega mme a pegwe pegwe mo botsofeng, ebole a golafetse mme—mme a tshabelwa ke go lwala, ebole a swa ka diintšhi. Modimo o ne a dumelela kopo eo. Go jalo. Goreng, Disontaga fela di le mmalwa tse di fetileng, o ne a eme fano mo ditilong tsa kereke, a opela Efangedi e e galalelang ya ga Keresete.

⁶³ Mona ke eng? Mona ke eng ka ga mma, mo go lebegang okare, ke ga pele ga nako, a ka nna dingwaga di le masome a marataro le botlhano, a tsamaya? Moo go raya eng? Ke Modimo a Itlhalosa, gore, “Ga a tle go gana ka sepe se se molemo mo go bao ba ba tlaa tsamayang ka thokgamo fa pele ga Gagwe.” Modimo, a tlhalosa mo go lone loso lwa gagwe, ke Modimo a re tlhalosetsa, gore Ena ke Modimo, mme O tlaa naya bao keletso ya pelo ya Gagwe, pelo ya bone, ba ba tlaa tsamayang ka thokgamo fa pele ga Gagwe.

⁶⁴ Re bonang sena, gore Ena ke Modimo, mme rotlhe re tshwanetse re tleng mo lefelong lena, fong a re lebeleleng ditshupo tsa Gagwe tsa ditlhaloso. Lorato lwa Gagwe, Kereke ya Gagwe, batho ba Gagwe, le sengwe le sengwe se e leng sone, tsotthe ke ditlhaloso tsa Modimo mo go rona. Fong ke akanya gore rotlhe re tshwanetse re obeng ditlhogo tsa rona ka boingotlo mme re lebogele Modimo botshelo jona jo e leng gore, ka Keresete, o fentse le e leng loso ka bolone.

⁶⁵ Mme fong Mafoko a ga Jesu fa A ne a ile ko go morwadia Jairo, “Ena ga a swa, fela o robetse.” O ile borokong jwa gagwe, mme eseng ko losong lwa gagwe. Gonno o ne a swa dingwaga di le dintsitse di fetileng, jaaka mosetsanyana, mme jaanong o tshela mo go Keresete; mme o robetse fela, mo go rona, fela o thantse le Keresete.

⁶⁶ A re obeng ditlhogo tsa rona ka nako e mme re neyeng ditebogo ka ntsha ya botshelo jo bo pelokgale jona.

⁶⁷ Rara wa Legodimo, jaaka go sololetswe O itse dipelo tsa rona, jaaka go itsiwe O itse dikakanyo mo monaganong wa rona. O itse gotlhe ka ga rona. Re Lobopo lwa seatla sa Gago. O a itse re maswabi go bona Kgaitsadi Bell a tlositswe mo go rona. Fela, Modimo, re obamisa ditlhogo tsa rona le dipelo, ka ditebogo gore topo ya gagwe e ne ya dumelela, le gore keletso ya Gago ka ntsha ya gagwe e ne ya diragadiwa. Gore, le e leng fano fa bokhutlong jwa tsela, fa ditatolo tsa gagwe di ne di kwadiwa mo botshelong jwa mongwe le mongwe yo neng a amana nae, mo e leng gore o ne a le motlhanka wa Gago. Mma tlhotlholetso ya gagwe e tshele ruri mo dipeleng tsa bothle ba ba mo itseng. Modimo, re rapeela gore O tlaa lapolosa mowa wa gagwe wa botho o o pelokgale mo Lefatsheng leo le a neng a le rata, a bileng a ne a bua ka ga lone le go opela ka ga lone, dinyaga tsotlhe tsena.

⁶⁸ O Ke rapeela Jimmy, tshokologong eno, Morena. Fa ke mmona a dutse foo, mme ena a tlhalosa dikakanyo tsa gagwe jaaka dikeledi tse di jaaka legakwa di elela mo lerameng la

gagwe. Ena o akanya ka ga mosadi yo o ikanyegang. Mme ka bana ba, dikeledi di elela mo marameng a bone, ba akantse ka ga mma yo o rategang. Mme re a rapela, Modimo, gore O tlaa ba segofatsa. Gomotsa dipelo tsa bone. Otlolola Seatla seo, gore go feta phitlhelelo ya sengwe le sengwe se sele, se se ka yang ko pelong ya motho wa nama, mme o ba neele thethebalo e kgolo ena, gore letsatsi lengwe re tlaa kopana gape, mme ga re kitla re nna le tirelo e nngwe ya phitlho Koo.

⁶⁹ Segofatsa ba gagwe ba ba rategang, bokgantsadie, bokgaitsadie, ditlogolo tsa gagwe, le baagisanyi ba gagwe.

⁷⁰ Le dikereke tsena, Morena, re a itse ka fa ba neng ba mo rata. Jaaka a ne a tsamaya mo gare ga rona, bone, o tsamaile mo gare ga bone. Mme ga mmogo, le bone, Morena, re—re abelana maikutlo a mantlentle ana a a kopanetsweng, gore re ne re mo rata. Mme re fano re supa a rona—a rona—malebogo a rona ko go Wena, ka ntlha ya botshelo jwa gagwe.

⁷¹ Re bope, Morena, mme o re dire, gore rona, le rona, fa re tla kwa bokhutlong jwa tsela, re bo re ithhwatlhwaaeditse go Go kgatlhantsha. Itshwarele maleo a rona a mantsi, Ao tlhe Modimo wa Bosakhutleng. Nna le boutlwelo botlhoko mo go rona, Morena, gonne re bokoa ebile re lapisegile.

⁷² Mme ke a rapela gore O tlaa re naya kgomotso, tshokologong eno. Mma re go fitlhele mo mafokong ana a a nnileng a tlhalosiwa mo Lefokong la Gago, ka badiredi ba ba farologaneng, le bao ba ba laoletsweng pele go tlisa a a jaana, le ka baagelani le ditsala. Mma re fitlhele teng foo, ka bopaki jwa—jwa dithunya, le ditlhare, le phatsimo ya letsatsi, matlhare, le—le kwa godimo ga tsotlhe, ka Bolengteng jwa Mowa o o Boitshepo, jo bo pakang tsogo ya ga Keresete. “Ga ke tle go lo tlogela lo sena mogomotsi. Ke tlaa rapela Rara, mme O tlaa lo naya Mogomotsi yo mongwe, mme O tlaa aga ka bosafeleng.” Ao, ka fa re Mo ratang ka gone, Morena! Le ka fa re Go itumelelang go Mo romela ko go rona, go re naya tlhomamiso ena e e segofetseng mo dioureng le nakong ya bothata.

Jaanong re neele nonofo ka ntlha ya go tla ga tirelo e e kwa pejana.

⁷³ Ke rata go kopa mo go faphegileng, Morena, fela jaanong ka ntlha ya basimane bana ba ba dutseng fano ka yunifomo. A go segofatswe basimane bao, jaaka ba tlaa tshwanela go boela ko maemong a bone. Fela ke a rapela, Morena, gore ka letsatsi leo... Re itumelela diyunifomo tsena tse ba di aparang jaanong. Fela mma thapelo ya ga mma e arabiwe: mma ba bo ba apere mo boitshepong le tshiamong ya ga Jesu Keresete, ka letsatsi leo. Basetsana, le bottlhe ga mmogo, Morena, seo ke se re batlang go nna sone, masole a Bakeresete, tumelo e e nonofileng ka mmatota. Re supetse tsela o bo o re kaele go fitlha letsatsing leo, Morena, nakong e re kopanang gape.

⁷⁴ Re Go lebogela botshelo jwa gagwe jaanong, mme re rapela gore O tlaa nna le rona rotlhe go fitlhela rotlhe re kopana fa dinaong tsa Gago. Ka Leina la Jesu re a go kopa. Amen.



DITLHALOSO TSW62-0313
(Expressions)

Molaêtsa o ka Mokaulengwe William Marrion Branham, o nê wa rêrwa la ntlha ka Sekgowa mo tshokologong ya Labobedi, Mopitlwé 13, 1962, go direlwa phitlhó ya ga Kgaitadi Mary Bell kwa Motlaaganeng wa Branham ko Jeffersonville, Indiana, U.S.A., o tsérwe mó theiping ya makenete mme wa gatisiwa ka Sekgowa o sa khutswafadiwa. Phuthololô e ya Setswana e gatisitswê le go abiwa ke ba ga Voice Of God Recordings.

TSWANA

©2022 VGR, ALL RIGHTS RESERVED

VOICE OF GOD RECORDINGS, SOUTH AFRICA OFFICE
58 DISA ROAD, ADMIRAL'S PARK, GORDON'S BAY 7140 WESTERN CAPE
REPUBLIC OF SOUTH AFRICA

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Kitsisô ka tetlokhopi

Ditshiamelo tsotlhe di sireleditswe. Buka e e ka gatisiwa fa motšhineng wa go gatisa wa ka fa lelapêng gore e dirisiwe ka namana kgotsa gore e abêlanwe, go se tuêdisô epê, e le sedirisiwa sa go gasa Efangele ya Jesu Keresete. Buka e ga e ka ke e rekisiwe, e boelediwe ka bontsi, e baiwe fa webosaeteng, e bolokiwe mo mofuteng oo e ka tlhagisiwang gape ka one, e fetolêlwé go maleme a mangwe kgotsa e dirisiwe go kgobokanya madi kwa ntle ga tetla e e kwadilweng ya Voice Of God Recordings®.

Go ka bolêlêlwá go feta fa kgotsa go ka itse ka dilo tse dingwe tse di leng têng, tswêêtswêê, ikamanye le ba ga:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org